



PRIMA SESSIONE STRASURDINARIA DI U 2019

1ère session extraordinaire de 2019

23 è 24 di maghju

23 et 24 mai

2019/E1/043

Question déposée par Vannina ANGELINI-BURESI au nom du groupe CORSICA LIBERA

Objet : *Cummerci aiaccini*

Sgiò Prisedenti,

« Simu à l'attachju di u mudellu di l'ipermercatu ». Sò e parolle di Jean-Charles Naouri, u PDG di u gruppu Casino.

Tuttu hè relativu.

In e nostre cità, è in Aiacciu in particolare, sò i nostri picculi cummerci à chjode e so porte in u mentre chì u Statu difende affari smisurati permettendu l'apertura d'ipermercati chè no sapemu digià cundannati. Da tandu ch'elli si multiplicheghjanu à a periferia, trasfurmeghjanu ancu u paisaghju vistu da u spaziu, occupendu 7 terreni di ballò è ancu di più. L'ipermercati favurizeghjanu a precarietà di l'impiegati, sterpanu l'impieghi di u centru cità, rompenu u liame suciale, cuncentranu i ricchezzi è l'alluntanatu da a Corsica. À st'incalcatu lucale s'aghjunghje u numericu chì s'impatruneghja una parte impurtante di u mercatu. U centru cità ùn deve smarì da sazià l'appititti è l'egò di certi. Sta cavalleria ùn si pò impone à i Corsi è divintà un mudelu di sucietà. A pulitica, l'azione publica, anu da turnà à piglià a manu di pettu à sta frenesia speculativa. L'Assemblea di Corsica hà fattu altri scelti, quelli di u PAD-DUC.

I problematichi di circolazione è di staziunamentu anu dinò un impattu negativu à nantu à l'attrattività di u centru cità è di i so cummerci ; u tempu di a vittura regina hè passatu, ma tocca à a putenza publica di mette in ballu altre suluzione di mublilità.

Pudemu fà. L'urgenza c'hè. A cità hè una bella invenzione da turnà à inventà ogni ghjornu. L'esempii ci sò à pallate. Ùn ci hè fatalità. In Aiacciu, chjodenu e linee di trasporti in cumunu. S'aprenu in altrò. Cumu serà ? In Aiacciu, ci vulerebbe à accità

a desorganizzazione di u serviziu di trasportu publicu. In altrò, si sviluppa l'intermodalità. Cumu serà ? Tengu à purtà u mo sustegnu à l'agenti di Muvistrada chì si mubliliseghjanu à prò di u serviziu publicu, da difende una certa visione d'Aiacciu è di a Corsica. Malgradu e numerose chjame lampate da i cummercianti è da a CCI, dapoi anni è anni, versu à a municipalità è a nostra culletività, l'Aiaccini aspettanu sempre u megliuramentu di l'accessibilità è di l'attrattività di u centru cità. Ancu quand'elli stanu fora, ci volenu travaglià, spassighjà, campà.

Oghje ghjornu un muratoriu à nantu à l'apertura d'ipermercati ùn basta più. Ci tocca à cummicà megliu à nantu à i dispositivi d'aiutu à l'impresi in difficoltà. L'ADEC s'hè impegnata in stu sensu à travaglià ci cù i membri di a CDAE. Hè stata annunziata mentre a riunione di a commissione d'aiutu à i picculi cummerci di u 13 maghju scorsu à l'invitu di u Presidente di a CCI 2A. Hè stata dumandata dinù a messa in opera d'un domu di prutezzione di i cummerci cù a stesa di e misure d'aiutu è d'accompagnamentu pè l'artigiani è i cummercianti, nant'à u mudellu di u dispositivu « gilets jaunes » in e cità e più tocche da e manifestazione. Infine, ci tocca à esse attenti chì l'attività turistica stagionale ùn accelleressi a desertificazione invernale di u centru cità.

Stu sughjettu chjama à una riflessione multidimensionale. Tocca à a fiscalità, à l'accunamentu urbanu ma ancu à u mudellu di sucietà chè no' vulemu pè a Corsica.

À a seguita di a visita di u ministru Lemaire di nuvembre scorsu, ùn s'hè più intesu nunda. Eppure, eranu abbastanza aperte e so dichjarazione concurnendu u statutu fiscale è suciale prupostu da u presidente di l'Assemblea di Corsica è e misure pè a salvezza di e nostre TPE è PME. Per ciò chì tocca à e nostre cumpetenze, avemu a pussibilità di mette in opera un domu di prutezzione di i picculi cummerci cù l'ADEC. Ci puderate dà un almanaccu precisu di a messa in ballu di quelle misure da sustene li è da mantene li ? Comu vidite l'intermodalità di i trasporti publichi, in leia cù a CAPA ? Qualessi sò i vostri prughjetti da accuncià l'intrata di u portu di cummerciu d'Aiacciu cù u fundariu di a CDC ? Sti sughjetti sò di a nostra respunsabilità, sò urgenti è necessari da migliurà l'attrattività è l'accessibilità di a cità, in lea cù i CFC è a municipalità d'Aiacciu chì gira trà oziu è lascia corre.

À ringrazià vi.